

# SPAD pantau MRT

Anggota dalam jawatankuasa pelaksana pastikan projek ikut jadual

**K**UALA LUMPUR: Suruhanjaya Pengangkutan Awam Darat (SPAD) sentiasa memantau perkembangan projek transit aliran massa MyRapid Transit (MRT) bagi memastikan projek sistem pengangkutan awam negara berjalan lancar mengikut jadual, kata Pengerusi SPAD, Tan Sri Syed Hamid Albar.

Beliau berkata, untuk memastikan projek mega itu tidak tertangguh, SPAD menempatkan anggotanya dalam dua jawatankuasa pelaksanaan MRT yang dipengerusikan Ketua Setiausaha Negara.

Sehingga kini, katanya, projek yang dilancarkan Perdana Menteri Datuk Seri Najib Razak pada Julai tahun lepas itu berjalan lancar mengikut jadual dan boleh disiapkan sepenuhnya pada 2016.

"MRT projek sangat penting bagi SPAD. Ia mengikut masa



**SYED HAMID...pantau**

seperti dijadualkan.

"SPAD penyelia yang diberikan kuasa dan kami juga mempunyai pegawai sebagai exco dan anggota pasukan teknikal dalam jawatankuasa pelaksanaan. Kami duduk di sana dan pantau, jadi kami tahu apa perkembangannya," katanya kepada pem-

berita selepas merasmikan Forum Pengangkutan Awam Darat di sini, semalam.

Forum dua hari itu bertujuan membincangkan mengenai pelan dan hala tuju pengangkutan awam darat yang dihadiri pemegang berkepentingan dari sektor kerajaan, swasta, ahli akademik serta diplomat dari Singapura, Jepun, United Kingdom, Perancis dan Zambia.

Ia anjuran secara bersama dengan UK Trade and Investment (UKTI).

Sehingga Mac lalu, 27 pakej kerja dianugerahkan kepada kontraktor yang layak meliputi kerja-kerja awalan seperti pengalihan utiliti dan penyediaan tanah daripada 86 pakej keseluruhan kerja MRT.

Merentasi laluan sejauh 51 kilometer dari Sungai Buloh ke Kajang dengan melalui Bandar Utama, Damansara,

Taman Tun Dr Ismail, pusat bandar raya Kuala Lumpur dan Cheras, yang terkenal dengan kepadatan penduduknya, MRT adalah projek prasarana terbesar Malaysia dan projek terbesar Bidang Ekonomi Utama Negara (NKEA) di bawah Model Baru Ekonomi (MEB).

Apabila siap sepenuhnya pada 2016, MRT akan memberi kemudahan kepada lebih 10 juta penumpang di Lembah Klang dan sekurangnya 50 peratus penduduk Lembah Klang dijangka beralih menggunakan pengangkutan awam.

Dalam perkara yang lain, Syed Hamid turut menjelaskan subsidi tayar berharga RM520 kepada pemandu teksi adalah tayar bersaiz 13 inci dan tidak termasuk kos pemasangan dan tenaga kerja yang perlu ditanggung sendiri pemandu teksi. - Bernama